



# 20 de marzo: Manifestación pola derrogación da Lei de Augas



ESPAÑA  
FRANQUEO  
CONCERTADO  
F.C. N° 15000077



O 23 de febreiro, presentábase en sociiedade a Plataforma contra a Lei de Augas. Na rolda de prensa compareceron, de esquerda a dereita, Xosé Alfredo Pereira, presidente da Organización Galega de Comunidades de Montes; Carme Freire, secretaria xeral do Sindicato Labrego Galego; e Manoel Santos, director de Altermundo. Neste acto, anunciábase unha manifestación pedindo a derrogación da lei para o 20 de marzo.

**D**urante o mes de febreiro, leváronse a cabo diversas accións de cara a organizar a resistencia contra a Lei de Augas de Galicia. Mentre que o día 11 o SLG facía un chamamento a todas as organizacións sociais e á cidadanía para unir forzas de cara a defender que a auga siga a ser un

ben público e universal; o 23 de febreiro callaba a convocatoria coa constitución da Plataforma contra a Lei de Augas, que conta co apoio inicial, a nivel da Galiza, de Sindicato Labrego Galego, Organización Galega de Comunidades de Montes, Amarante, Marcha Mundial das Mulleres e Altermundo.

Neste acto de presentación, anunciábase tamén o inicio das mobilizacións cunha manifestación programada para o 20 de marzo, ás 12:00 horas en Compostela, en torno ao Día Mundial da Auga. O obxectivo fundamental da Plataforma é un só e irrenunciable: a derrogación da lei.

Páxs. 4 a 6

# A Plataforma contra a Lei de Augas convoca manifestación o 20 de marzo

O SLG forma parte deste movemento cívico que quere forzar a derrogación desta lei tan lesiva para Galiza

*O 10 de febreiro, reuníase a Dirección Nacional do SLG e decidía fazer un chamamento público a todas as organizacións sociais de Galiza, sen incluir partidos políticos, de cara a mobi-*

*lizarse para forzar a derrogación da Lei de Augas. Ao día seguinte, o 11 de febreiro, Carme Freire e Manuel Docampo comparecían ante os medios de comunicación para fazer o chama-*

*do, que callou o 23 de febreiro, cando fixo a súa presentación pública a Plataforma contra a Lei de Augas. No calendario, unha data, o 20 de marzo, para comenzar as mobilizacións.*

Na rolda de prensa do 11 de febreiro, tanto Manuel Docampo, membro da Executiva do SLG, como Carme Freire, secretaria xeral, coincidiron en sinalar que a Lei de Augas é a máis grande agresión sufrida por Galiza na era democrática. Mientras que Docampo advertiu que "se privatiza un elemento indispensable para a vida das persoas e dos animais, e para a producción de alimentos", Freire foi máis alá e afirmou que "se privatiza o noso dereito a vivir".

Dende o punto de vista legal, Manuel Docampo explicou que as competencias sobre a auga foron transferidas polo Estado Español á Xunta no ano 1986, a través do Real Decreto 2.792. O feito de cederlle estas competencias a unha empresa como Augas de Galicia que, dende o punto de vista xurídico, funciona como unha sociedade anónima (ao ser Augas de Galicia un organismo de dereito privado), fai que a lei impulsada pola Xunta poida estar raiando a inconstitucionalidade.

Parte desta campaña consistirá en pedirle aos concellos que se manifesten en contra da lei negándose a colaborar no cobro do canon. Neste senso, o SLG mantivo, nas últimas semanas, encontros cos principais partidos políticos que se van presentar ás eleccións municipais (PP, PSOE, BNG e EU).

A secretaria xeral do SLG tamén chamou a atención do Conselleiro de Medio Ambiente, Territorio e Infraestruturas, Agustín Hernández, e pediulle que deixe de

tomarlle o pelo ao pobo galego, en referencia ás súas declaracions de que a Lei de Augas non se ía aplicar. Freire replicou dicíndolle que "se creou unha lei para despois non aplicala, o mellor que pode facer é derrogala".

Finalmente, Carme Freire advertiu que "a auga é un recurso público e natural que non ten prezo e, polo tanto, non a imos pagar. Imos parar esta Lei de Augas, pese a quen pese, especialmente a aqueles que pretendían especular e facer negocio a costa deste recurso fundamental para a vida. Se a auga é nosa, toda esta loita tamén vai ser nosa, e o Goberno que aprobou esta lei lesiva e agresiva para toda a cidadanía vai ter que derrogala porque non lle imos dar tregua para que a aplique".

Arriba, rolda de prensa na que se presentou a Plataforma Galega contra a Lei de Augas, celebrada o 23 de febreiro; abaixo, charla de Manuel Docampo enmarcada nas Xornadas de Agroecoloxía de Ourense, o pasado 22 de febreiro.



## A cidade de Ferrol tamén contra a lei

Grazas ao regulamento de participación ciadá do Concello de Ferrol, a secretaria xeral do Sindicato Labrego Galego, Carme Freire, participou, o pasado 24 de febreiro, no pleno municipal ferrolán para defender a derrogación da Lei de Augas de Galiza por atentar contra o dereito básico da cidadanía a beber e, por extensión, a vivir. Cos votos de PSOE, BNG e EU, a moción presentada por esta última formación política saíu cara a adiante, polo que o Concello de Ferrol se converte no primeiro na Galiza en pronunciarse a favor da derrogación da Lei de Augas.



**Carme Freire,**  
secretaria xeral do Sindicato Labrego Galego



**“A auga debe ser un ben gratuíto para a vida das persoas, dos animais e da sociedade”**

A secretaria xeral do Sindicato Labrego Galego, Carme Freire foi a encargada de adiantar a data de comezo das mobilizacións para forzar a derrogación desta lei “lesiva para toda a ciudadanía”: o 20 de marzo, en Santiago de Compostela, Día Mundial da Auga. Freire xustificou a xestación da Plataforma e a convocatoria de mobilizacións por dous motivos fundamentais.

En primeiro lugar, porque “a auga é un ben público, un ben da natureza e, polo tanto, non pode ser obxecto de negocio para ningún tipo de empresa, calquera que sexa a súa natureza; ademais, a auga debe ser un ben gratuíto para a vida das persoas, dos animais e da sociedade”. En segundo lugar, porque “non se pode privatizar un ben como a auga, porque non se pode decidir por lei que sexa unha empresa de dereito privado, como Augas de Galiza, a que pase a xestionar un recurso básico para a vida como é a auga”.

**Manoel Santos,**  
director de Altermundo



**“A Lei de Augas de Galiza é unha aberración absoluta que vai contra os dereitos humanos”**

O director de Altermundo, Manoel Santos, explicou que “o gran cambio que supón esta lei non é que se privatice un subministro, unha depuración ou un servizo; senón que se privatiza o elemento, é dicir, danse dereitos de explotación e cobro sobre a utilización da auga da choiva ou do mar. É verdadeiramente abraiente”.

Santos lembrou que en países como Francia se están a dar pasos, xustamente, no sentido contrario, coa remunicipalización do servizo de subministro de augas en máis de corenta concellos no último ano, entre os que se inclúe París. Nembargante, “no noso país se lle deixa toda a xestión de augas a unha empresa, Augas de Galiza que é pública, pero que coa nova lei se converteu ao dereito privado”, o que supón “unha aberración absoluta que vai contra os dereitos humanos, porque a auga é un dereito humano como así estableceu a ONU”.

**Xosé Alfredo Pereira,**  
presidente de ORGACMM



**“Imos concienciar e mobilizar á sociedade para que a Lei de Augas non vaia para adiante”**

O presidente da Organización Galega de Comunidades de Montes, Xosé Alfredo Pereira, encadrou a Lei de Augas nun contexto xeral de “privatizacíons continuas por parte do Goberno do Partido Popular que, dende que chegou á Xunta, está privatizando todos os servizos públicos. Se antes foron os servizos de dependencia e igualdade, agora é a auga, e mañá serán os montes veciños e de mancomún”. Pereira afirmou que “non imos pasar por aí e imos concienciar e mobilizar á sociedade para que isto non vaia para adiante”.

Respecto a si a plataforma estaba en contra dos controis de contaminación e calidade da auga que pretende promover a lei, Pereira contestou con tres preguntas: ¿Estamos de acordo en que hai que facer un consumo responsable da auga? Si. ¿Estamos de acordo en que hai que tomar medidas contra a contaminación? Si. ¿Iso obriga a privatizar a auga? Non.

**20 de marzo  
en Compostela**

# **Manifestación pola derrogación da Lei de Augas de Galiza**

**Saída ás 12:00 horas desde a Alameda**